


**Ni Presidente
Henry B. Eyring**
Umuna a Mammagbaga iti
Umuna a Panguluen



Ti Libro ni Mormon kas Bukod a Pangiwanwan

Mariknatayo amin, kadagiti kasayaatan a kani-
totayo, ti tarigagay nga agsubli iti pagtaengan
a makadenna ti Dios. Inikkannatayo iti sagut
ti Patpatgenna nga Anak kas Mangisalakantayo tapno
mangipaay iti dalan ken tapno isurona kadatayo no
kasano a surotentayo daytoy. Inikkannatayo kadagiti
propeta a mangitudo iti dalan. Naparegta ni Propeta
Joseph Smith a mangipatarus iti kasuratan dagiti propeta
a daytoy ket ti Libro ni Mormon. Daytoy ti awan duadua
a pangiwantawantayo iti dalan nga agawid iti Dios.

Kinuna ni Joseph Smith maipapan iti dayta a napateg
a libro, “Imbagak kadagiti kakabsat a ti Libro ni Mormon
ti kalintegan a libro ditoy daga ken isu ti pagbatayan
ti pammatitayo, ket as-asideg ti tao iti Dios babaen ti
panangsuotna kadagiti linaonna, ngem ti sabali a libro.”¹

Dagiti linaon ti Libro ni Mormon ket dagiti bilin ti
Dios a masarakantayo ditoy. Ti sumagmamano ket dagiti
pudno ken nalawag a bilin manipud iti Mangisalakan
babaen kadagiti propetana kas iti no ania ti nasken nga
aramidentayo ken no ania ti nasken a pagbalinantayo. Ti
Libro ni Mormon ket mangted kadatayo iti pagwadan ti
Mangisalakan tapno mangpatibker iti pammati ken determi-
nasiontayo nga agtungpal a sumurot Kenkuana. Napnuan
ti libro iti doktrina ni Cristo a mangiwantawantayo.
Daytoy ti maysa a pagwadan manipud iti 2 Nephi:

“Kinuna ni [Jesus] kadagiti annak ti tao: Surotendak.
Gapuna, ay-ayatek a kakabsatko, mabalintay kadi ti
sumurot ken ni Jesus no saantayo met a salimetmetan ti
bilin ti Ama?

“Ket kinuna ti Ama: Agbabawikayo, agbabawikayo,
ket mabuniagankayo koma iti nagan ti Ay-ayatek nga
Anak” (2 Nephi 31:10–11).

Ilawlawag ti libro a nasken nga awatentayo ti Espiritu
Santo kas maysa a panagbuniag ti apuy a makatulong
kadatayo nga agtalinaed iti naillet ken akikid a dalan.
Nasruantayo a nasken nga agkararagtayo a kanayon iti
nagan ni Cristo, a saan nga agkapuy, ket no aramiden-
tayo, addaantayo iti daytoy a kari: “Gapuna, masapul
nga agtultuloykayo a sitatalingenngen ken ni Cristo, nga
addaan iti naan-anay a kinalawag ti namnama, ken ayat
iti Dios ken iti amin a tao. Gapuna, no agtultuloykayo,
nga agpennek iti balikas ni Cristo, ken agibtur agingga
iti panungpalan, adtoy, kuna ti Ama: Maaddaankayto iti
biag nga agnanayon” (2 Nephi 31:20).

Ilawlawag ti Libro ni Mormon iti nakaskasdaaw a
sermon ni Ari Benjamin no ania ti kayat a sawen ti
maaddaan iti ayat ti Dios ken ti amin a tao. No agbal-
baliw dagiti ugalitayo babaen ti bileg ti Pannubbot ken
babaen ti napudno a panagtungpaltayo kadagiti bilin,
mapnotayonto iti ayat ti Dios (kitaen iti Mosiah 4:1–12).

Mangted pay kadatayo ti Libro ni Mormon iti panagtalek a makapagbalintayo a natarnaw unay itoy a biag tapno awan tarigagaytayon nga agaramid pay iti dakes (kitaen iti Mosiah 5:2). Mangted kadatayo daytoy a namnama iti tured ken liwliwa bayat ti pananggandat ni Satanas a mangsulisog ken mangupay kadatayo iti dalantayo.

Tunggal kanito a basaek ti uray sumagmamano laeng a binatang iti Libro ni Mormon, mariknak a napapigsa ti pammaneknekkko a pudno ti libro, a ni Jesus isu ti Cristo, a mabalintayo ti sumurot Kenkuana nga agsubli a makipagtaeng kenkuana, ken mabalintayo nga ikuyog a makipagtaeng dagiti ay-ayatentayo iti denna ti Dios. Para kaniak daytoy ti kaindaklan kadagiti libro. Daytoy ti balikas ti Dios.

Ikararagko ta sapay koma nga uminum a siuuneg ken inaldaw manipud ditoy ti amin nga ay-ayatentayo. Paneknekak iti nagan ni Jesucristo a daytoy ti pudno a pangiwawan.

NAGADAWAN

1. *Teachings of Presidents of the Church: Joseph Smith* (2007), 64.

PANANGISURO MANIPUD ITI DAYTOY A MENSAHE

“**N**o usarentayo dagiti nasantuan a kasuratan ken dagiti balikas dagiti propeta iti ud-udina nga aldaw kas pagtaudan ti amin a panangisurotayo, awisentayo ti Espiritu nga agpaneknek. Daytoy ti mangyeg iti panangisurotayo ‘ti bileg ti Dios a mangallukoy kadagiti tao’ (DkK 11:21)” (*Teaching, No Greater Call* [1999], 51). Ibilang a basaen dagiti bugas [highlights] manipud iti mensahe ni Presidente Eyring, agraman ti palawag ni Joseph Smith maipapan iti Libro ni Mormon. Awisem dagiti miembro ti familia a mangiburay no kasano a makatulong kadakuada ti panagbiag kadagiti pannursuro a masarakan iti Libro ni Mormon tapno ad-adda a mayasidegda iti Dios.

“No paglilinnawagan dagiti sursuruan dagiti pagbatayan manipud kadagiti nasantuan a kasuratan, mapadur-asda dagiti paglaingan para iti bukodda a panagadal iti nasantuan a kasuratan” (*Teaching, No Greater Call*, 54). Ibilang nga adalen dagiti nasantuan a kasuratan maipapan iti daytoy a mensahe ken sapulen ken pailawlawag dagiti pagbatayan nga isuro dagitoy.

AGTUTUBO

Bukodko a Libro ni Mormon

Ni Hillary Holbrook

Idi Agosto 2005, idi nangted ni Presidente Gordon B. Hinckley (1910–2008) iti karit kadagiti miembro ti Simbaan a basaenda ti Libro ni Mormon sakbay ti gibus ti tawen, inkarik iti bagik a basaek ti sibubukel a libro. Pamiliarak kadagiti estoria iti Libro ni Mormon ngem diak pay pulos nabasa ti amin a pinanidna. Ita kayatko a tungpalen ti karik.

Nasuruanak idin a mangipakat kadagiti nasantuan a kasuratan iti biagko ket aramidek dagitoy a napapateg iti bukodko. Iti kasta bayat ti panagbasak, insuratko kadagiti mardiyin ti panid no ania iti panagkunak a kangrunaan nga ideya dayta a binatang. Kasta met nga inugedak dagiti naulit a balikas ken ragup ti balikas a mangipakita iti panangyunay-unay.

Inkabilko ti naganko a sumaruno iti nagnagan kadagiti nasantuan a kasuratan tapno makatulong kaniak a manglagip a ti balikas ti Dios a naisao kadagiti sabali ket mabalin met a balikas a naisao kaniak. Kas pagarigan, iti 2 Nephi 2:28 insuratko ti naganko: “Ket ita, [Hillary], kayatko nga agtalekka iti naindaklan a Mangibabaet, ken denggem dagiti naindaklan a bilinna.” Ti ad-adda a panangaramidko a bukodko ti Libro ni Mormon, ad-adda met ti panaggagarko nga agbasa iti daytoy iti tunggal aldaw.

Bayat ti panagbasak iti inaldaw, nagbalin a naimpusuan ken personal dagiti kararagko. Kasta met a kinabaelak ti nangipamaysa kadagiti klasek ken nangsurot kadagiti parikna ti Espiritu a makigayyem kadagiti sabali. Iti maudi a rabii ti tawen, nalpasko a binasa ti Libro ni Mormon.

Naawatak kalpasanna ti kinapateg ti panagbasa iti sibubukel a Libro ni Mormon, a kagiddan dagiti daduma pay a nasantuan a kasuratan, ken kayatko nga aramiden iti mamin-adu pay a gundaway iti biagko.

ANNAK

Pangiwawan a Mangtulog Kadatayo nga Agsubli iti Dios

Kasano ti mariknam no nayaw-awanka ket dimo ammo ti dalan nga agawid iti pamiliam? Maragsakanka kadi no masurotmo ti maysa a tao a makaipakita kenka iti dalan? Kuna ni Presidente Eyring

a ti Libro ni Mormon ket kas iti pangiwanwan a mangtulong kadatayo a makasubli iti pagtaengan iti Nailangitan nga Ama.

Iti baba ket dagiti sumagmamano a banag nga ibaga kadatayo ti Libro ni Mormon a kasapulantayo tapno makasubli a makipagtaeng iti Dios. Basaem ti 2 Nephi 31:10, 11, 20. Iti baba ti tunggal ragup ti

balikas iti baba, isuratmo ti umno a bersikulo manipud iti Libro ni Mormon. Kasapulamtayo nga usaren iti mamindua ti maysa kadagiti bersikulo.

Agbabawi ken agpabuniagka.

Maaddaan iti nalawag a namnama.

Ayatem ti Dios ken ti amin a tao.

Surotem ni Jesus.



Pammati • Pamilia • Tulong

Ti Pagrebbengantayo a Mangaywan iti Tumantanor a Kaputotan

Adalem daytoy a material ken, no mayannatup, ilawlawagmo daytoy kadagiti kakabsat a babbai a sarungkaranyo. Usarem dagiti saludsod a makatulong kenka a mangpapigsa kadagiti kakabsat a babbai ken tapno mangaramid iti Relief Society kas aktibo a paset ti bukodmo a biag.

Manipud kadagiti Nasantuan a

Kasuratan : Dagiti Proverbio 22:6; Taga-Efeso 6:4; Enos 1:1; Alma 53:20–21; 56:47; 57:27

No awan ti panagaywan, mabalin nga agpeggad ti tumantanor a kaputotantayo iti panagbalinda a kas iti maysa a nailadawan iti Mosiah 26. Adu nga agtutubo ti saan a namati kadagiti kannawidan dagiti ammada ken nagbalinda a naisina a tattao iti pammatida, a nagtalinaedda a kasta kalpasanna. Mabalin a maipada a mayaw-awan ti tumantanor a kaputotantayo no saanda a maawatan ti pasetda iti plano ti Nailangitan nga Ama.

Ngarud ania ti mangpatalinaed a natalgedto ti tumantanor a kaputotan? Iti Simbaan, isurotayo dagiti pangisalakan a pagbatayan, ken dagita a pagbatayan ket pagbatayan ti pamilia, dagiti pagbatayan a mangtulongto iti tumantanor a kaputotan a mangbukel iti maysa a pamilia, suruan dayta a pamila, ken isagana dayta a pamilia para kadagiti ordinansa ken katulagan—ket kalpasanna suruanto ti sumaruno a kaputotan ti sumaruno ken agtultuloy.

Kas nagannak, dadaulo, ken miembro ti Simbaan, isagsaganatayo daytoy a kaputotan para kadagiti bendision ni Abraham, para iti templo. Adda

pagrebbengantayo a mangilawlawag a nasayaat kadagiti kangrunaan a punto ti doktrina a masarakan iti waragawag iti kaaamaan. Ti kinaina ken kinaama ket agnanayon nga akem ken pagrebbengan. Tunggal maysa kadatayo ket addaan iti pagrebbengan para iti akem ti lalaki wenno ti babai iti plano.

Mabalintayo nga isuro daytoy a doktrina iti ania man a lugar. Nasken nga isaritatayo nga addaan iti panagraem ti kallaysa ken pamilia. Ken manipud iti pagwadantayo, ti tumantanor a kaputotan ket makagun-od iti dakkel a namnama ken pannakaawat—saan laeng a manipud kadagiti balikas nga isaotayo no di ketdi pay manipud iti wagas a panagriknatayo ken panangipagwadan kadagiti nasayaat a pagbatayan maipanggep iti pamilia.

Ni Julie B. Beck, sapsap a presidente ti Relief Society.

Manipud iti Pakasaritaantayo

Iti panagsaritana kadagiti kakabsat a babbai iti sapsap a miting ti Relief Society idi Septiembre 23, 1995, kinuna ni Presidente Gordon B. Hinckley: “Ti lubong a yantayo ket maysa a lubong a napnuan iti riribuk, napnuan kadagiti masukansukat nga ik-ikkan pateg. Gargariennatayo

dagiti napipigsa a timek a mangaramid kadagiti adu a banag tapno mangliput iti nabayagen a nasubok a pagrukodan ti ugali.”¹ Kalpasanna intuloy ni Presidente Hinckley nga inyam-ammo kadagiti kakabsat a babbai, ti Simbaan, ken iti kamaudiananna kadagiti tao iti amin a lugar ti “Ti Kaamaan: Maysa a Waragawag iti Lubong.”

Kadagiti sumaruno a tawen naipatarus daytoy napropetaan a dokumento iti adu a pagsasao ken naibunong kadagiti dadaulo iti sangalubongan. Agkiddaw daytoy kadagiti umili ken dadaulo ti gobierno “a mangitandudo kadagita a pagrukodan a naisangrat a mangpatalinaed ken mangpapigsa iti kaamaan a kas kangrunaan a benneg ti kagimongan.”²

Nagbalin ti waragawag a pundsion dagiti pammati ti Santo iti Ud-udina nga Aldaw maipapan iti pamilia, maysa a palawag a pagkaptantayo a naimbag ken pakaammuan a babaen ti panagbiag kadagiti pammilinna, papapigsaentayo dagiti pamilia ken pagtaengantayo.

DAGITI NAGADAWAN

1. Gordon B. Hinckley, “Stand Strong against the Wiles of the World,” *Ensign*, Nob. 1995, 99.
2. Kitaen iti “Ti Kaamaan: Maysa a Waragawag iti Lubong,” *Liahona*, Okt. 2004, 49.

Ania ti Maaramidko?

1. Kasano a matulongak dagiti kakabsatko a babbai a mangusar iti “Ti Kaamaan: Maysa a Waragawag iti Lubong” tapno mangaywan iti tumantanor a kaputotan? Mabalín nga ibilangmo ti panangibinglay iti kopia ti waragawag ken panangtulong kadagiti kakabsat a babbai a mangilasin ken mangmarka kadagita a binatang a kasayaatan a mangisuro kadagiti kangrunaan a doktrina.

2. Kasano a maaywanak ti tumantanor a kaputotan? Mabalín nga ibilangmo ti panangtulong kadagiti miembro ti wardmo, branchmo, pamilyam, wenno komunidadmo a mabalín a mairanud iti atension ken ayatmo.

Para iti ad-adu pay a pannakaammo, inkayo iti www.reliefsociety.lds.org.